

CONVIVENZA

Nua resta la magia?

FADRINA HOFMANN

Il Son Niclà na datti betg, la lieur da Pasca era betg e la diala da dents è en vardad la mamma. Mia figlia è vegnida dacurt indesch e gia dapi in'urella è ella confrontada cun la dira realitad. Enstagl da l'agitaziun la saira da Son Niclà, cura ch'ins udiva las brunsinas ed ils pass grevs da Son Niclà, datti ussa be anc in satgin cun nuschs, tschigulattas e mandarinas sin la maisa d'ensolver – e forsa anc in pop da pasta. Enstagl dad eglis traglischants durant tschertgar ils gniesus da Pasca datti oz cudeschs ed ina lieur da tschigulatta per mintga uffant. La diala da dents è daventada obsoleta. Ils dentins da latg èn conservads en ina tructetta en furma da cor e ma regordan a la sfida da prender il dentin sut il plimatsch ora e da'l barattar cun in dad in franc senza dasdar l'uffant. Mes uffants n'èn betg pli pitschens. Il mat è gia in giuvenil, la matta prenda ussa plaunet cumià da tut ses giugarets. Ina nova era ha cumenzà en chasa Hofmann.

Jau na sun betg in tip nostalgic, jau depluresch però che la magia è svanida plaun a plaun or da nossa vita da mintgadi. Blessuras na sa laschan betg pli striunar davent cun ina chanzun u in verset. Nauschs siemis na pon betg pli vegnir tschiffads cun in maun giu



dal frunt, transportads a la fanestra e bittads ora lunsch davent. Broccoli è simplamain be broccoli e na gida betg pli a sviluppar forzas dad eroxs. Ed en il gaud na tschertgain nus betg pli nanins sut las ragischs dals bostgs. Il mund ha perdi in zic sia glischur – per mes uffants tant sco per mai.

Naturalmain ha la fasa giuvenila era sias bellezzas. Tgi che ha gia passentà la pubertad dals agens uffants, sa dentant che quel temp n'ha da far nagut cun magia – almain betg per ils geniturs. Ils uffants daveentan critics, quai ch'è atgnamain bun ed impurtant. Els mettan en dumonda tut ed entschaivan a discutir davart mintga piculezza. Tenor psicologs è quella fasa essenziala per il svilup, per geniturs dentant simplamain be stentusa. Mes giuvenils cumenzan però er ad esser independents ed a surpigliar dapli responsabladad. Els sviluppan in grondius umor ed ins po discurs-

rer cun els sur da tut ils temas pussaivels, schizunt davart la politica mundiala. Stupent è ch'ins po finalmain guardar ensemen films che na derivan betg da Disney u Pixar.

Corporalmain surpassan mes uffants proximalmain mai. Quai n'è betg uschè difficil, jau na sun propi betg uschè gronda. Entant ch'els guardan be fisicamain giu sin mai, n'hai jau nagin problem cun quai. Jau m'allegrel era, cura che mia figlia ha finalmain pes pli gronds che jau, lura na dovra ella betg pli mes chalzers che svaneschan regularmain giu da curuna.

La magia n'è anc betg ida en nossa famiglia. I dat adina puspè muments ch'ans laschan fugir da la dira realitad. Da Pasca han mes uffants decidì da betg vulair renunziar al colurar ovs. Sco mintg'onn avain nus tadlà il disc cumpact cun chanzuns da Pasca ed avain creà vairas ovras d'art. Lura hai jau zuppà ils ovs en curtin. Tge gaudi da'ls laschar tschertgar da mes uffants gronds! Che la lieur da Pasca n'exista betg, avevan nus en quel mument bunamain emblidà.

Fadrina Hofmann è redactura tar la «Südoschtweiz» e viva cun sia famiglia a Scuol.

La convivenza da las linguas e culturas en il Grischun – quai è il tema da la columna «Convivenza» che cumpara mintga glindesdi en la Südoschtweiz ed en La Quotidiana.